


菽園雜記

一



後漢書



菽園雜記

(一)

陸容撰

菽園雜記提要

菽園雜記十五卷明陸容撰容字文量號式齋太倉州人成化丙戌進士官至浙江右參政事蹟具明史文苑傳史稱容與張泰、陸欽齊名時號婁東三鳳其詩才不及泰欽而博學過之是編乃其劄錄之文於明代朝野故實敍述頗詳多可與史相考證旁及談諧雜事皆竝列簡編蓋自唐宋以來說部之體如是也中間頗有考辨如元王柏作二南相配圖棄甘棠何彼穠矣野有死麕三篇於經義極爲乖刺而容獨嘆爲卓識又文廟別作寢殿祀啓聖公而配以四配之父其議發於熊禾而容謂叔梁紇爲主出於無謂孟孫激非聖賢之徒不當從祀尤昧於崇功報本之義皆不足爲據然核其大致可採者較多王鏊嘗語其門人曰本朝記事之書當以陸文量爲第一卽指此書也雖無雙之譽獎借過深要其所以取之者必有在矣

菽園雜記卷一

明陸容撰

朝廷每端午節賜朝官喫糕糉於午門外酒數行而出文職大臣仍從駕幸後苑觀武臣射柳事畢皆出上迎母后幸內沼看划龍船砲聲不絕蓋宣德以來故事也丙戌歲砲聲無聞人疑之後聞供奉者云是日內官奏放砲上止之云酸子聞之便有許多議論也上之顧恤人言如此可以仰見聖德矣奉天門常朝御座後內官持一小扇金黃絹以裹之嘗聞一老將軍云非扇也其名卓影辟邪永樂間外國所進但聞其名不知爲何物也

嘗聞尙衣縫人云上近體衣俱松江三梭布所製本朝家法如此太廟紅綺絲拜裯立脚處乃紅布其品節又如此今富貴家佻健子弟乃有以紵絲綾段爲袴者暴殄過分甚矣

近見洪武四年御試錄總提調中書省官二人讀卷官祭酒博士給事中修撰各一人監試官御史二人掌卷受卷彌封官各主事一人對讀官司丞編修二人搜檢懷挾監門巡綽所鎮撫各一人禮部提調官尙書二人次御試策題又次恩榮次第云洪武四年二月十九日廷試二十日午門外唱名張掛黃榜奉天殿欽聽宣諭同日除授職名於奉天門謝恩二十二日賜宴於中書省二十三日國子學謁先聖行釋菜禮第一甲三名賜進士及第第一名授員外郎第二名第三名授主事第二甲一十七名賜進士出身俱授主事第三甲一百名賜同進士出身俱授縣丞姓名下籍狀與今式同國初制度簡略

如此今進士登科錄首錄禮部官奏殿試日期合請讀卷及執事官員數進士出身等第聖旨俞允謂之玉音次錄讀卷提調監試受卷彌封掌卷巡綽印卷供給各官職名又次錄三月一日諸貢士赴內府殿試上御奉天殿親試策問三日早文武百官朝服錦衣衛設鹵簿于丹陛丹墀內上御奉天殿鴻臚寺官傳制唱名禮部官捧黃榜鼓樂導出長安左門外張掛畢順天府官用傘蓋儀從送狀元歸第四日賜宴於禮部宴畢赴鴻臚寺習儀五日賜狀元朝服冠帶及進士寶鈔六日狀元率諸進士上表謝恩七日狀元諸進士詣先師孔子廟行釋菜禮禮部奏請命工部於國子監立石題名朝廷或有事則殿試移他日謂之恩榮次第又次錄進士甲第一甲三人賜進士及第第二甲若干人賜進士出身第三甲若干人賜同進士出身每人名下各具家狀最後錄第一甲三人所對策其家狀式姓名下云貫某府某州某縣某籍某生治某經字某行幾年幾歲某月某日生曾祖某祖某父某母某氏祖父母父母俱存曰重慶下父母俱存曰具慶下父存母故曰嚴侍下父故母存曰慈侍下父母俱故永感下兄某弟某娶某氏某處鄉試第幾名會試第幾名

予奉命犒師寧夏內府乙字庫關領軍士冬衣見內官手持數珠一串色類象骨而紅潤過之間其所製云太宗皇帝白溝河大戰陣亡軍士積骸徧野上念之命收其頭骨規成數珠分賜內官念佛冀其輪回又有顛骨深大者則以盛淨水供佛名天靈盃皆胡僧之教也

予使跡所及歷趙秦伊周四王府朝見日皆有宴惟秦王親宴於承運門品饌豐盛餘皆長史陪宴賓館

成禮而已。聞秦王之母太妃陳氏賢而且嚴。每朝使至。必令王出宴云。非惟見爾敬重朝廷。好言好事。亦得見聞。若在宮中。不過與婦人相接而已。實有何益。酒殼已具。必令人舁入觀之。如不佳。典膳廚役。皆受撻辱。王之所以無失禮賓客者。由太妃之賢也。

各鎮戍鎮守內官競以所在土物進奉。謂之孝順。陝西有木實名檉。肉色似桃。而上下平正如柿。其氣甚香。其味酸澀。以蜜制之。歲爲進貢。然終非佳味也。太監王敏鎮守陝西時。始奏罷之。省費頗多。敏本漢府軍餘。善踢鞠。宣廟愛而賜之。常熟知縣郭南上虞人。虞山出軟栗。民有獻南者。南亟命種者悉拔去。云異日必有以此殃害常熟之民者。其爲民遠慮如此。因類記之。

環慶之墟有鹽池。產鹽皆方塊。如骰子。色瑩然明徹。蓋卽所謂水晶鹽也。池底又有鹽根如石。土人取之。規爲盤盂。凡煮肉貯其中。抄勺皆有鹽味。用之年久。則日漸銷薄。甘肅靈夏之地。又有青、黃、紅鹽三種。皆生池中。

陝西布政司本唐宰相府。前堂屏辰後。有方石池。中刻波浪紋。云是宰相冰果之器。後堂簷下有一石池。中地稍高。四周有走水渠。云是宰相用以割羊。又有釘官石。石理中斷。釘歷歷可見。云唐舉子以此自占。凡釘入者。終身利達。不入者不利。往往有驗云。

焚書祇是要人愚。人未愚。時國已墟。惟有一人愚不得。又從黃石授兵書。此焚書坑詩。不知何人所作。家君常誦之。坑在驪山下。卽坑儒谷是也。

正統己巳車駕蒙塵敵勢甚熾羣情騷然太監金英集廷臣議其事衆囁嚅久之翰林徐珵元玉謂宜南遷英甚不以爲然適兵部尙書于謙奏欲斬倡南遷之議者衆心遂決景皇帝旣卽位意欲易儲一日語英曰七月初二日東宮生日也英叩頭云東宮生日是十一月初二日上爲之默然蓋上所言者謂懷獻英所言者謂今上也意與獻陵之對正相似珵後改名有貞

陝西環縣界有唐時木波合道等城遺址志書以爲范文正公守環時所築嘗考之唐德宗興元十三年二月集方渠合道木波三城邠寧節度使楊朝晟之力也文正公或因其舊址而修築之故云

溫泉在臨潼縣驪山北麓卽唐之華清宮故址山上有玉女祠乃其發源處唐時每歲臨幸宮殿壯麗今惟此池存焉上覆屋數楹四周甃以甓石其水寒煖適調清徹可鑑絲髮湯泉若句容宣府遵化等處亦有之其佳勝宜莫如此然以官府掌之非貴宦無由得浴其外別引泉爲男女混堂二處則居民共之

居庸關外抵宣府驛遞官皆百戶爲之陝西環縣以北抵寧夏亦然蓋其地無府州縣故也然居庸以北水甘美穀菜皆多環縣之北皆鹹地其水味苦飲之或至泄利驛官於冬月取雪實窖中化水以供上官尋常使客罕能得也

吾蘇陳僖敏公鑑爲都御史巡撫陝西時用法寬平臨事簡易數年間雨暘時若年穀屢登民信愛之以其美髯鬚呼爲鬍子爺爺嘗以議事還朝民訛傳得代遮道借留者數千人公諭以當復來始稍稍散

去及其復來焚香迎候亦然民父母及身有疾者發願爲公昇輜則不事醫藥祈禱輒愈一出行臺人爭昇之雖禁之不息也及公去有畫像事之者其得民如此代公者欲懲其弊而濟之以猛識者亦以爲宜然民雖陽畏而陰實怒之且旱潦相仍邊事日作非復昔時之氣象矣故善論公者以爲非但其德有以惠乎民而其福之庇乎民者亦博矣

陝西都指揮司整幼嘗結數惡少爲義弟兄一人受挫則共力復仇整嘗擊殺一人於都市歌樓主家執之不力被脫去乃執其與劉某於官究整所在劉曰我實殺之非整也衆證爲整劉自認益堅法司不能奪乃論死後得未減發充遼東三萬衛軍整德之每歲供其軍貲時整有老母故劉誣代之古之俠士不能過也

太監牛玉之敗南京六科給事中王徽等因上疏言宦官干政專權置立私宅等事皆祖宗時所無請一切禁革之其言讜直切中時弊徽等各調任遠州判官天下之士莫不慕其風采徽字尚文南京人丙戌歲予犒師寧夏過寧州聞判官李某數中人問及此事李云始謀於王淵志默恐同寮有進止者乃焚香告天以爲盟奏本則各草一通俱送尚文以備采取若爲首則六科以次列名不容退避蓋舊規也志默紹興山陰人謫四川茂州判官予以此舉徽擅其名而淵之力居多故表著之

陝西城中舊無水道井亦不多居民日汲水西門外參政余公子俊知西安府時以爲關中險要之地使城閉數日民何以生始鑿渠城中引灞滻水從東入西出環甃其下以通水其上仍爲平地迤邐作井

口使民得以就汲此永世之利也。

西嶽華山西鎮吳山皆在陝西境內載在祀典而西安又有五嶽廟陳僖敏巡撫時既不能毀而又奏請重修之失禮甚矣況勞民傷財在所得已此不學之過也。

水東日記云世稱警悟有局幹人曰乖覺于兵部奏內常用之然未見所出乃引韓退之羅隱乖角字以爲與今乖覺意正相反蓋奏詞移文間用方言時語不必一一有出也今之所謂乖卽古之所謂黠黠豈美德哉韻書訓乖云戾也背也離也凡乖者必與人背離如與人相約諫君劾姦死難稍計利害則避而違之以自全反謂不違者爲癡此正所謂乖角耳。

正統丙辰狀元周旋溫州永嘉人聞閣老預定第一甲三人候讀卷時間同在內諸公云周旋儀貌如何或以豐美對閣老喜及傳臚不類所聞蓋豐美者嚴州周瑄聽之不眞而誤對耳天順庚辰曹欽反連捕其黨馮益損之甚急一星士馮益謙之就逮亦棄市蓋二人皆寧波人且同名故有此誤人之禍福固非偶然然亦有如此者所謂命也。

慶陽西北行二百五十里爲環縣縣之城北枕山麓周圍三里許編民餘四百戶而城居者僅數十家戍兵僦屋閭巷不能容至假學宮居之其土沙瘠其水味苦乍飲之病脾泄出趙大夫溝者味甘然去城十餘里歲祀先師則取釀酒不可以給日用也驛廩稍供稻米蓋買諸慶陽粟一斗得稻米一升薪木則買諸開城開城亦小邑去環八十里地有美薪其愈環可知矣其古蹟則靈武臺在焉唐肅宗以太

子卽位其處城之南有唐時木波合道等城遺址尙存居數日校官率舉業弟子五六人執經請益咸謹朴使之析義理皆頗能之與談古今及他文事類莫能知嘗與索韻書徧城中不可得蓋其地僻陋無賢師友校官來師者各以所通經授弟子或不久去則貿貿焉無能成其終者無惑乎人才之難也巡撫陝西都憲嘉禾項公忠令慶陽邠寧州縣督民種樹道旁民頗怨之巡撫延綏都憲廣東盧公祥有詩嘲之其終篇云可惜路旁如許地只栽榆柳不栽桑項公和韻云老我豈無衣食計安知此地不宜桑二詩今在慶陽公館壁間邠寧慶陽皆古幽地七月之詩言蠶桑之事備矣要之盧公之言得之莊浪參將趙妥兒土人也嘗馬蹶視土中有物得一刀甚異每地方將有事則自出其鞘者寸餘鞘當刀口處常自割壞識者云此靈物也宜時以羊血塗其口妥兒賴其靈每察見出鞘則預爲之備以是守邊有年卒無敗事太監劉馬兒還朝日求此刀不與以是掩其功不得陞

民間俗諱各處有之而吳中爲甚如舟行諱住諱翻以箸爲快兒幡布爲抹布諱離散以梨爲圓果傘爲豎笠諱狼籍以榔槌爲興哥諱惱躁以謝竈爲謝歡喜此皆俚俗可笑處今士大夫亦有犯俗稱快兒者

洪武中朝廷訪求通曉歷數數往知來試無不驗者必封侯食祿千五百石山東監生周敬心奏言國祚長短在德厚薄非歷數之可定三代有道之長固所定論三代而下深仁厚德者漢唐宋而已如漢高之寬仁繼以文景之恭儉昭宣之賢明光武之中興章帝之長者唐太宗之力行仁義宋太祖之誠心

愛民是以有道之長國祚最短者莫如秦其次如隋又其次如五代始皇之酷虐煬帝之苛暴五代之窮兇是皆人事所致豈在歷數欽惟聖上應天眷命掃滅羣雄救亂誅暴其功大矣然神武過於漢高而寬仁不及賢明過於太宗而忠厚不及是以御宇以來政教未敷四方未治伏乞效漢高之寬仁同太宗之誠慤法三代之稅斂則帝王之祚可傳萬世又何必問諸卜技之人邪又言陛下連年遠征臣民萬口一辭皆知爲恥不得傳國寶欲取之耳臣聞傳國寶出自戰國楚平王時以卞和所得之玉琢之秦始皇祕之名曰御璽自是以來歷代珍之遂有是名易曰聖人之大寶曰位何以守位曰仁是知仁乃人君之寶玉璽非寶也且戰國之君趙先得寶而國不守五代之君皆得寶皆不旋踵而亡蓋徒知玉璽之爲寶而不知仁義之爲大寶故也天下治安享國之久者莫如三代三代之時未有玉璽是知有天下者在仁義而不在此璽亦明矣今爲取寶使兵革數動軍民困苦是忽真正之大寶而易無用之小寶也聖人智出天下明照萬物何乃輕此而重彼愛彼而不愛此邪又言方今力役繁難戶口雖多而民勞者衆賦斂過厚田糧雖實而民窮者衆教化博矣而民不說所謂徒善也法度嚴矣而民不服所謂徒法也昔者汲黯言於漢武帝曰陛下內多慾而外施仁義奈何欲效唐虞之治乎方今國則願富兵則願強城池則願高深宮室則願華麗土地則願廣人民則願衆於是多取軍士廣積錢財征伐之舉無虛日土木之功無已時如之何其可治也又言洪武四年欽錄天下官吏十三年連坐胡黨十九年起天下積年民害二十三年大殺京民此妄立罪名不分臧否一槩殺之豈無忠臣烈士善

人君子誤入名項之中於茲見陛下之德薄而殺戮之機深矣夫自古不嗜殺人者能一天下而殺之多者後嗣不昌秦隋元魏之君好殺不已其後至於滅絕種類漢時誤殺一孝婦致東海枯旱三年方今水旱連年未臻大稔未必不由殺戮無辜感傷和氣之所致也又言明主之制賞不僭刑不濫今刑既濫矣復賞賜無節天下老人非功非德人賜鈔五錠征出軍官位高而祿厚平寇禦侮亦其職分當然今乃賞賜無極夫厚斂重科窮民困苦而濫賜無功之人甚無謂也宜節無功之賞以寬窮民之賦則天下幸甚萬姓幸甚其餘若通鈔法罷充軍等事皆切時弊約三千餘言節其要錄之敬心不知爲山東某州縣人後仕某官問之山東仕於朝者皆莫之知已無官守言責而能直言如此何其壯哉不可泯也

孟子云傅說舉於版築之間屈原云說操築於傅巖兮武丁用而不疑二書築字猶周詩築室百堵之築蔡氏註說築傅巖之野云築居也今言所居猶謂之卜築蓋以版築胥靡之事說賢者不宜有此爲賢者諱故云然爾然孟屈去殷周未遠必有所傳況耕稼陶漁不足以病舜釣弋獵較不足以累孔窮而操築亦何足以爲說諱乎

古人於圖畫書籍皆有印記云某人圖書今人遂以其印呼爲圖書正猶碑記碑銘本謂刻記銘於碑也今遂以碑爲文章之名莫之正矣

前輩詩文稿不愜意者多不存獨於墓誌表碣之類皆存之者蓋有意焉景泰甲戌進士薊州錢源其先

崑山人嘗以公差過崑訪求其祖墓父老無能知者居數日沈通理檢家藏前人墓誌得洪武七年邑人盧熊所爲錢瑞妻章氏墓誌始知其祖墓在今儒學之後而封表之於是知葬埋之不可無誌而誌葬者世系墓地尤不可以不詳也士大夫得親戚故舊墓文必收藏之而不使之廢棄亦厚德之一端也源本沙頭郁氏子郁與錢世連姻錢無子郁以一子爲其後後戍蘄州郁今爲醫官錢氏則已絕矣吳中鄉村唱山歌大率多道男女情致而已惟一歌云南山脚下一缸油姊妹兩箇合梳頭大箇梳做盤龍髻小箇梳做揚籃頭不知何意朱廷評樹之嘗以問予予思之翼日報云此歌得非言人之所業本同厥初惟其心之趣向稍異則其成就遂有大不同者作如是觀可乎樹之云君之穎悟過我矣作如是觀此山歌第一曲也

菽園雜記卷二

天順初有歐御史者考選學校士去留多不公富室子弟懼黜者或以賄免吾崑鄭進士文康篤論士也。嘗送一被黜生詩篇末云王嬌本是傾城色愛惜黃金自悞身事可知矣時有被黜者相率鳴訴于巡撫曹州李公秉公不爲理未幾李得代順德崔公恭繼之諸生復往訴公一一親試之取其可者檄送入學不數年去而成名者甚衆皆崔公之力也二公一以鎮靜爲務一以伸理爲心似皆有見若其孰爲得失必有能辨之者。

天順三年南直隸清理軍伍御史郭觀持法頗刻崑山縣有一人誣首者至連坐二十四人充軍予家時爲里正亦在遣中將欲伸冤於巡撫公聞太倉查用純嫻習吏學與謀之查云巡撫與御史各領敕書行事訴之無益又謀之崑城高以平氏高云訴之可也或以查語質之高云此非有識之言也在京刑部都察院獄情必大理寺評允無礙才敢決斷御史在外行事旁若無人刑獄苟有冤抑伸理平反非巡撫而誰訴之有益於是往訴都憲崔公果爲平反之二十四人皆復爲民諺云事要好問三老信然天順癸未會試寓京邸嘗戲爲魁星圖題其上云天門之下有鬼踢斗癸未之魁筆錠入手貼於座壁亡何失去時陸鼎儀寓友人溫秉中家出以爲斂予爲之惘然問所從來云昨日倚門一兒持此示我以果易之予默以爲吾二人得失之兆矣未幾鼎儀中第一名予下第。

本朝開科取士京畿與各布政司鄉試在子午卯酉年秋八月禮部會試在辰丑未戌年春二月蓋定規也洪武癸未太宗渡江天順癸未貢院火皆以其年八月會試明年三月殿試於是二次有甲申科貢院火時舉人死者九十餘人好事者爲詩云回祿如何也忌才春風散作禮闈災碧桃難向天邊種丹桂翻從火裏開豪氣滿場爭吐焰壯心一夜盡成灰曲江勝事今何在白骨稜稜漫作堆至今誦之令人傷感或云蘇州奚昌元啓作

正統間工部侍郎王某出入太監王振之門某貌美而無鬚善伺候振顏色振甚眷之一日問某曰王侍郎爾何無鬚某對云公無鬚兒子豈敢有鬚人傳以爲笑

新舉人朝見著青衫不著襯衫者聞始於宣宗有命欲其異於歲貢生耳及其下第送國子監仍著襯衫蓋國學自有成規也

本朝政體度越前代者甚多其大者數事如前代公主寡再爲擇婿今無之前代中官被寵與朝臣竝任有以功封公侯者今中官有寵者賜袍帶有軍功者增其祿食而已前代京尹刺史皆有生殺之權今雖王公不敢擅殺人前代重臣得自辟任下寮今大臣有專擅選官之律前代文廟聖賢皆用塑像本朝初建國學革去塑像皆用木主前代嶽鎮海瀆皆有崇名美號今止以山水本名稱其神郡縣城隍及歷代忠臣烈士後世溢美之稱俱令革去前代文武官皆得用官妓今挾妓宿娼有禁甚至罷職不敍

陳元孚先生讀書法生則慢讀吟語句熟則疾讀貪遍數攀聯以續其斷喝怒以正其誤未熟切忌背誦既倦不如少住如此力少功多乃是讀書要務

薛主事機河東人言其鄉人有患耳鳴者時或作瘻以物探之出蟲蛻輕白如鵝翎管中膜一日與其侶竝耕忽雷雨交作語其侶曰今日耳鳴特甚何也言未旣震雷一聲二人皆踣于地其一復醒其一腦裂而死卽耳鳴者乃知龍蟄其耳至是化去也戴主事春松江人言其鄉有衛生者手大指甲中見一紅筋時或曲直或蜿蜒而動或恐之曰此必承雨灌手龍集指甲也衛因號其指曰赤龍甲一日與客泛湖酒半雷電繞船水波震蕩衛戲語坐客曰吾家赤龍得無欲去邪乃出手船窗外龍果裂指而去此正與青州婦人青筋癢則龍出事相類傳云神龍或飛或潛能大能小其變化不測信矣哉

舊習舉業時嘗作詩說質疑一冊近已焚去存其有關大義者一二云

羔裘三章 朱氏云舍命不渝則必不徼倖以苟得而於守身之道得矣邦之司直則必不阿諛以求容而於事君之道得矣既能順命以持身又能忠直以事上此其所以爲邦之美士也如此說未爲不可但詳味語意在首章邦之司直邦之彥兮者贊美之辭耳

彤弓三章 輔氏云大抵此詩云云疑此說非是蓋載與橐是藏之之事喜與好是貺之之心右與醻是饗之之節耳當重在首章

六月有嚴有翼 謝氏云爲將必嚴云云軍士不整疑此說非是嚴敬二字相因豈可分屬將帥